

Kerajaan prihatin kenaikan harga barang – PM



Oleh MAISARAH SHEIKH RAHIM | 24 Januari 2022; 4:18 pm

PUTRAJAYA: Datuk Seri Ismail Sabri Yaakob memberi jaminan kerajaan amat prihatin tentang kenaikan harga barang pada masa ini.

Untuk itu, Perdana Menteri berkata, beliau akan mempengerusikan mesyuarat Majlis Tindakan Sara Hidup Negara (NACCOL) dalam masa terdekat bagi mendapatkan penjelasan terperinci.

“Kerajaan komited memastikan isu ini segera ditangani demi kesejahteraan Keluarga Malaysia,” katanya menerusi Twitter beliau hari ini.

Dewan Perniagaan Melayu Malaysia (DPMM) semalam menjangkakan semua barang tanpa mengira jenis akan mengalami kenaikan harga luar biasa selepas sambutan Tahun Baharu Cina bulan depan.

Perkara itu dibangkitkan Presiden DPMM, Abd. Halim Husin yang memberitahu, kenaikan harga barang itu didorong lonjakkan kos pengangkutan lebih sekali ganda selepas bencana banjir khususnya di Lembah Klang pada Disember lalu.

Dengan kenaikan mendadak itu, pihaknya menjangkakan harga barang juga akan naik bagi memastikan pengeluar masih mendapat keuntungan daripada penjualan barang selepas kawasan Shah Alam terjejas teruk banjir baru-baru ini yang merupakan antara kawasan pengeluar terbesar di Malaysia.

Justeru, mereka terkesan dengan bencana itu pasti akan menaikkan harga selepas situasi banjir.

Susulan itu, DPMM meminta kerajaan mengambil tindakan proaktif bagi mengawal harga barang daripada pengeluar dan pengguna supaya lebih berpatutan.

Media sebelum ini melaporkan, tekanan kos sara hidup disebabkan kenaikan harga barang, makanan dan perkhidmatan asas terus membengkung kebanyakan rakyat sejak negara dilanda wabak Covid-19.

Kenaikan harga bukan sahaja melibatkan barang runcit tetapi 'merebak' kepada harga makanan asas seperti ayam mentah dan sayur-sayuran.

Sementara itu, Presiden Persatuan Kontraktor Bumiputera Kelas F Malaysia (PERKOBF), Tukiman Radion turut berharap kerajaan dapat memantau kenaikan harga atau menetapkan harga siling untuk bahan binaan asas bagi membantu kontraktor kecil yang terbeban dengan kenaikan harga terus melambung sejak kebelakangan ini.